

GRIFFITHS, EVAN ('Ieuan Ebblig'; 1795 - 1873), gweinidog Annibynnol

Enw: Evan Griffiths
Ffugenw: Ieuan Ebblig
Dyddiad geni: 1795
Dyddiad marw: 1873
Rhyw: Gwryw
Galwedigaeth: gweinidog Annibynnol
Maes gweithgaredd: Crefydd
Awdur: Walter Thomas Morgan

Ganwyd 18 Ionawr 1795 yng Ngellibebblig ger Pen-y-bont-ar-Ogwr, yr ieuengaf o saith o blant. Bu'r tad farw pan oedd y plentyn yn 3 blwydd oed, ac oherwydd tlodi'r teulu ni chafodd lawer o fanteision addysg. Pan oedd yn 21 oed dechreuodd bregethu ac aeth am flyyddyn i ysgol a gadwai ei weinidog, W. Jones, Brynmenyn. Ar ôl hyn bu am ddwy flynedd mewn ysgol yng Nghasnewydd dan ofal [Dr. Jenkin Lewis](#). Ar ddiwedd y cyfnod hwn cymeradwyodd ei athro ef i'r [arglwyddes Barham](#) i gymryd gofal dwy eglwys, Pilton Green a Park Mill, ym Mro G yr. Dechreuodd ei weinidogaeth 3 Mai 1822 ac ordeiniwyd ef ddwy flynedd yn ddiweddarach, 21 Gorffennaf 1824. Ymddiswyddodd o'i fugeiliaeth, 4 Awst 1828, a symudodd i Abertawe i ymgymryd â'r gwaith o gyfieithu esboniad [Mathew Henry](#) i'r Gymraeg, ac ar fethdaliad yr argraffydd, J. A. Williams, yn 1830, prynodd Griffiths y busnes, ac o hyn ymlaen bu ef yn gyfrifol am gyfieithu a chyhoeddi 'r tair cyfrol olaf. Cyhoeddwyd cyf. II yn 1831 a'r ddwy gyfrol arall cyn diwedd 1835. Cyhoeddodd ei wasg hefyd fisolyn plant, *Y Rhosyn*, Hydref 1832-Rhagfyr 1833, a *Y Drysorfa Gynnulleidfaol*, Ionawr 1843-Rhagfyr 1845. Er nad oedd ganddo ofal eglwys daliai i bregethu yn gyson ar y Sul. Heblaw ei gyfieithiad o [Mathew Henry](#) cyhoeddodd dros 40 o gyfieithiadau a gweithiau gwreiddiol yn cynnwys cyfieithiadau i'r Gymraeg o *Lectures* (1839), a *Sermons Finney* (1841), *Eastern Customs Burder* (1837), *Mute Christian Brooks* (1830), *Church Member's Guide* J. A. James, a *Rise and Progress ...* Doddridge. Cyhoeddodd hefyd *eiriadur Cymraeg-Saesneg* (1847). Ceir rhai o'i lawysgrifau, yn cynnwys yn bennaf nodiadau pregethau, yn y Llyfrgell Genedlaethol (N.L.W. MSS. 28, 176, 177, 275). Priododd, 26 Mai 1829, Mrs. Mary Jones, a fu farw o'i flaen ef. Bu ef farw 31 Awst 1873 a chladdwyd ef ym mynwent Sgeti.

Awdur

Walter Thomas Morgan, (1912 - 1990)

Ffynonellau

Hanes Eglwysi Annibynnol Cymru, iv, 467-8

Ifano Jones, *A history of printing and printers in Wales to 1810, and of successive and related printers to 1923* (Cardiff 1925), 187

J. H. Davies, ed., *Catalogue of Additional Manuscripts in the National Library of Wales*

Catalogue of Printed Literature in the Welsh Department, Cardiff Free Libraries (1898)

Oxford Dictionary of National Biography

Dolenni Ychwanegol

VIAF: [39026397](#)

Wikidata: [Q5415404](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

